

9/12

SOALAN NO: 434

PEMBERITAHUAN PERTANYAAN DEWAN RAKYAT
JAWAPAN OLEH Y.B.DATUK SERI DR. S.SUBRAMANIAM
MENTERI KESIHATAN MALAYSIA

PERTANYAAN : BUKAN LISAN
DARIPADA : Dr. Hajah Siti Mariah Binti Mahmud
[Kota Raja]
TARIKH : -
SOALAN : 434

Dr. Hajah Siti Mariah Binti Mahmud [Kota Raja] minta **MENTERI KESIHATAN** menyatakan senarai terkini dan alasan produk kecantikan yang diharamkan penjualan serta langkah-langkah yang diambil untuk mengawal lambakan produk-produk kecantikan yang lain di pasaran yang dikhawatir mengandungi bahan-bahan terlarang yang membahayakan pengguna.

Tuan Yang di-Pertua,

Produk kecantikan atau biasanya dipanggil kosmetik bermaksud bahan atau sediaan yang digunakan ke atas bahagian luaran badan manusia untuk tujuan kecantikan. Di bawah Peraturan-Peraturan Kawalan Dadah dan Kosmetik 1984 semua produk kosmetik perlu dinotifikasi dengan Kementerian Kesihatan Malaysia (KKM) sebelum ianya boleh dikilang, diimport atau dijual di Malaysia.

Berdasarkan statistik dari tahun 2008 sehingga 2017, sejumlah 116 produk kosmetik bernotifikasi telah dikesan mengandungi bahan terlarang yang membahayakan pengguna. Sebanyak 48 (41.38%) produk didapati mengandungi merkuri, 23 (19.83%) produk didapati mengandungi campuran hydroquinone dan tretinoin, 19 (16.38%) produk mengandungi hydroquinone, 19 (16.38%) produk mengandungi tretinoin, 7 (6.03%) produk didapati mengandungi lain-lain bahan terlarang. Senarai terkini produk kosmetik yang diharamkan penjualan dan bahan terlarang yang dikesan adalah seperti di Lampiran 1. Orang awam juga boleh merujuk laman sesawang rasmi Bahagian Regulatori Farmasi Negara (www.npra.gov.my) atau laman rasmi Program Perkhidmatan Farmasi (www.pharmacy.gov.my) yang memaparkan senarai produk farmaseutikal termasuk produk kecantikan yang telah dikesan mengandungi bahan terlarang dan telah diambil tindakan penguatkuasaan sebagai panduan kepada orang ramai.

Untuk makluman YB Kota Raja, KKM menjalankan pemantauan secara berterusan terhadap produk kosmetik bernotifikasi di pasaran melalui Program Pengawasan Mutu Produk Kosmetik Bernotifikasi di Pasaran bagi memastikan ianya selamat dan berkualiti untuk kegunaan rakyat.

Ini dilaksanakan melalui aktiviti surveilans ke atas produk kosmetik di pasaran seperti persampelan dan pengujian produk, penyaringan maklumat dan formulasi produk kosmetik, audit Fail Maklumat Produk dan pemeriksaan premis pengilangan. Pemantauan iklan kosmetik juga turut dilaksanakan termasuk media cetak, elektronik dan media sosial bagi memastikan produk kosmetik di pasaran mematuhi keperluan undang-undang dan garispanduan yang ditetapkan.

Bagi membanteras penjualan produk kosmetik tidak bernotifikasi, KKM turut mengambil tindakan pemantauan ke atas penjualan dan pengiklanan kosmetik melalui saringan di pintu masuk negara dan aktiviti persampelan kosmetik dalam pasaran. Tindakan penguatkuasaan seperti pemeriksaan dan serbuan akan diambil ke atas syarikat atau individu yang didapati memiliki / menjual/ mengimport / mengilang kosmetik yang tidak bernotifikasi terutamanya premis di lokasi hot-spot yang telah dikenal pasti di seluruh negara dengan lebih giat dan kerap. Ini bertujuan untuk

Jika sabit kesalahan, seseorang individu boleh dihukum di bawah seksyen 12(1) Akta Jualan Dadah 1952 yang membawa hukuman denda tidak melebihi RM25,000.00 atau penjara tidak melebihi 3 tahun atau kedua-duanya sekali. Bagi kesalahan kedua, boleh didenda tidak melebihi RM50,000.00 atau penjara tidak melebihi 5 tahun atau kedua-duanya sekali. Bagi syarikat pula, boleh dihukum di bawah seksyen 12(2) Akta Jualan Dadah 1952 yang membawa hukuman denda tidak melebihi RM50,000.00 bagi kesalahan pertama, dan denda RM 100.000 bagi kesalahan berikutnya.

Orang ramai juga digalakkan untuk menyalurkan maklumat berkenaan produk kosmetik yang meragukan kepada pihak kementerian untuk membanteras penjualan kosmetik tidak bernotifikasi. Maklumat boleh disalurkan kepada Bahagian Perkhidmatan Farmasi, Kementerian Kesihatan Malaysia melalui laman sesawang <http://www.pharmacy.gov.my> atau di talian 03-78413200 dan juga di mana-mana Cawangan Penguatkuasa Farmasi di setiap negeri.